



URKOLA BELOKI familia

ZULOTA Egileor auzoko baserria da. Bertakoek diotenagatik bere izena zulo batean egotetik datorkio. Baserri inguruko soro eta basoen izenen artean daude: *Auzko barrutie, Mantoni soroa, Etxealdeko zelaia, Birane, Pikoango, Soroberri, Galtzo, Gaztinzabal*.

Baserritik herrira ordu erdiko bidea dago. 1980 inguruan egin ziren auzoko eta etxerainoko bideak. Etxe jabe dira 1992tik aurrera, eta 1999an egin zituzten konponketak. Komuna, sukaldea eta gelak berritu omen zituzten.

Felipa Etxeberria eta Joan Beloki 1943an ezkondu ziren. Felipa *Izar Bekoa* zen, Zaldibikoa. Joan, bertako semea. Zaldibin ezkondu ziren eta etxean egin zuten otordua.

Sei seme-alaba izan zituzten: Prantxika, Maria Jexux, Arantxa, Lurdes, Mari Jose eta Daniel.

1966an ezkondu zen bertako alaba Prantxika Urnietako *Barkaiztegi* baserriko Joxe Mari Urkolarekin. Etxean aita-amak eta bi anaia-arreba bizi ziren. Etxetik kanpo osaba Joxe Ramonek egiten zuen lan, artzain.

Baserrian bost behi eta bi idi zituzten. Laborantzan etxerako artoa, garia, babarruna, arbia eta erremolatxa egiten zituzten. Ordiziako ferian saltzen zituzten arrautzak, oilaskoak eta babarrunak.

Joxe Maria Urkolak, hamar urtez egin zuen lan Biloren. Bitartean Prantxika, gizonari gauez lana egitea tokatzen zitzaionean, goizeko bostetan jaiki,

behiak jetzi eta Zaldibira etortzen zen esnea partitzaera, eskailerak gora eta behera. Gizona goizeko 7etan ateratzen zen lanetik eta harekin bueltatzen zen berriz etxera.

Hiru seme-alaba izan zituzten: Maixabel, Daniel eta Amaia.

Baserriaren arrastoa idatzietan

Zulota agertzen da, Zuloeta izenarekin, 1783-12-17an, Francisco Antonio de Echaveren aurrean, Enerio eta Aralarko sailen erabileraz bitartekari bati emandako botere-emaileen artean. Bi ordezkari agertzen dira bilera hartan eta gerta daiteke bi etxebizitza izatea ordu hartan *Zulotan*.

Pasadizoak

Bertso zaletasuna

Familian bertso zaletasun handia zegoen. Herriko festetan etxean prestatzen omen zuten otordua eta mahai buru alde banatan aitona eta aita jartzen omen ziren, eta han aritzen omen ziren elkarri bertsotan. Bertso zaletasun hau muinean zeraman, Joan Beloki, aita-ere, eta bera hiru hilabetez gaixo egon omen zen etxean, oso argal-durik. Baina hil aurrean, bezperan, familia bildu bere inguruan eta bi bertso kantatu omen zizkien andreari eta seme-alabei.

Aitari ezin segitu

Behin batean Prantxika umea zela joan da aita-ekin mendira eta ezin segitu omen zion eta aita-ak utzi omen zuen arkaitz baten ondoan, esanez, hantxe egoteko, laister etorriko zela behorak ikusita. Eta bere lanak egin eta bueltan etorri zenean han omen zegoen Prantxika lo.

Asto gainean, Arkakara

Uda partean, zenbait igandetan, aita-ek egun pasa eramaten omen zituen seme-alabak asto gainean, zestotan bi ume txikiak eta erdian zaharrena meriendarekin. Arkakara joaten omen ziren.

Informazio emailea: Prantxika Beloki



BELOKI familia

Marixol Mendizabal (Hilariren alaba), Hilari Beloki, Maria Josefa Beloki eta Joxe Ramon Beloki.



BELOKI ETXEBERRIA familia

Felipa Etxeberria eta Joan Beloki.



BELOKI ETXEBERRIA familia

Maria Jexux, Felipa Etxeberria (ama), Joan Beloki (aita), Prantxika, Arantxa / Lurdes, Mari Jose eta Daniel.



URKOLA BELOKI familia

Daniel, Amaia, Maixabel, Prantxika (ama) eta Joxe Mari Urkola (aita).